

8 de abril de 2018, Día Internacional do Pobo Xitano

Declaración Institucional

Fundación Secretariado Xitano

A Fundación Secretariado Xitano, como cada 8 de abril, súmase á celebración do Día Internacional do Pobo Xitano. Unha data que lembra o Congreso Mundial xitano celebrado en Londres o 08 de abril de 1971 no que se instituíron a bandeira e o himno xitano, símbolos dunha identidade cunha historia e cultura propia. Un bo momento para a homenaxe e lembranza a todas aquelas vítimas xitanas dunha longa historia de exclusión, rexeitamento e persecucións. Un bo momento para lembrar ás nosas sociedades que o pobo xitano sigue vivindo hoxe en día, en España e en Europa, unha cidadanía *de segunda*.

A pesares dos avances sociais que se produciron nas últimas décadas, e a pesar dos pasos que se deron máis recentemente no recoñecemento institucional da comunidade xitana, os xitanos e xitanas seguen vivindo situacións de grave desigualdade, exclusión e segregación respecto ó conxunto da cidadanía; continúan sendo o grupo social máis discriminado, tanto en España como na Unión Europea; e aínda na actualidade son excluídos dos procesos de participación social dos que gozan o resto de cidadáns e cidadás en sociedades como a nosa. Dende os poderes públicos moitas veces danse respostas parciais, sectoriais e a corto prazo a unha realidade que non ten en conta o valor da diversidade cultural e que non a recoñece como factor de desenvolvemento na sociedade.

Falta abordar a cuestión xitana dende a perspectiva integral de recoñecemento cultural, de dereitos e de cidadanía.

Fronte á persistente fenda de desigualdade que sofren as persoas xitanas no acceso e desfrute de dereitos sociais básicos, como o dereito a unha vivenda digna, o dereito á educación, ou a un traballo e a unhas condicións laborais equitativas e satisfactorias, cómpren políticas que realmente protexan, promovan e defendan dereitos, tamén das minorías e dos grupos socialmente máis desfavorecidos; fronte ó crecente rexeitamento ó *diferente* e a discursos excluíntes que promoven prexuízos e estereotipos negativos e incitan á discriminación e ó discurso de odio cara determinados grupos, como as persoas xitanas, cómpre máis educación, máis sensibilización e máis implicación da lexislación que garanta a promoción da igualdade e o dereito á non discriminación; fronte a dinámicas sociais que exclúen ou ocultan sistematicamente ás persoas xitanas de procesos de participación cidadá e de recoñecemento cultural, precísanse políticas que

favorezan espazos e canles de participación de persoas e grupos con identidades culturais plurais e diversas.

Para garantir o exercicio da plena cidadanía da comunidade xitana dende o recoñecemento á súa identidade cultural, é preciso, por tanto, avanzar en paralelo en tres direccións: o acceso e gozo en igualdade de condicións dos dereitos sociais; a protección fronte á vulnerabilidade do dereito á non discriminación; así como o recoñecemento institucional da súa identidade cultural e a promoción da súa participación nas diversas esferas da sociedade, como cidadáns e cidadás, como xitanos e xitanas, para pór en valor a súa identidade cultural e as aportacións que ó longo da historia fixeron á sociedade.

O Día Internacional do Pobo Xitano, aínda sen ser recoñecido oficialmente en España, celébrase cada vez máis en pobos e cidades pola implicación e o compromiso de numerosas administracións, entidades e institucións que recoñecen ó pobo xitano como parte inherente da nosa sociedade. É un bo momento, por tanto, para reivindicar a diversidade cultural e o valor que aportan as múltiples identidades culturais, plurais, diversas e dinámicas que, como a xitana, conforman a nosa sociedade.

E tamén é un bo momento para pedir o apoio dos poderes públicos e a solidariedade da sociedade para avanzar, coma o fan outros grupos ou colectivos máis activos ou con maiores apoios na sociedade, cara o recoñecemento duns dereitos económicos, sociais e culturais que permitan ós xitanos e xitanas non só mellorar as súas condicións de vida, senón ser parte activa da cidadanía.